



UNDANG-UNDANG SARAWAK

Bab 46

ORDINAN KESALAHAN JENAYAH SYARIAH, 2001

Tarikh Diluluskan oleh Dewan
Undangan Negeri 6hb November, 2001

Tarikh Dipersetujui 10hb Disember, 2001

Tarikh Diterbitkan dalam *Warta* ... 27hb Disember, 2001

THE SYARIAH CRIMINAL OFFENCES ORDINANCE, 2001

DATE OF COMMENCEMENT

In exercise of the powers conferred by section 1(1) of the Syariah Criminal Offences Ordinance, 2001 [*Cap. 46*], the Chief Minister has appointed the 1st day of December, 2004, as the date on which the Ordinance shall come into force.

**ORDINAN KESALAHAN JENAYAH
SYARIAH, 2001**

SUSUNAN SEKSYEN

BAHAGIAN I
PERMULAAN

Seksyen

1. Tajuk ringkas, permulaan kuat kuasa dan pemakaian
2. Tafsiran

BAHAGIAN II
KESALAHAN YANG BERHUBUNGAN DENGAN 'AQIDAH

3. Pemujaan salah
4. Doktrin palsu
5. Mengembangkan doktrin agama, dsb.
6. Dakwaan palsu

BAHAGIAN III
KESALAHAN YANG BERHUBUNGAN DENGAN KESUCIAN
AGAMA ISLAM DAN INSTITUSINYA

7. Menghina, atau menyebabkan dipandang hina, dll., agama Islam
 8. Mempersendakan, dll., ayat *Al-Quran* atau *Hadith*
 9. Menghina atau mengingkari pihak berkuasa agama
 10. Mengingkari perintah Mahkamah
 11. Mengajar agama tanpa *tauliah*
 12. Pendapat yang bertentangan dengan *fatwa*
 13. Penerbitan agama yang bertentangan dengan Undang-Undang Islam
-

Seksyen

14. Tidak menghormati *Ramadhan*
15. Berjudi
16. Minuman yang memabukkan

BAHAGIAN IV

KESALAHAN YANG BERHUBUNGAN DENGAN KESUSILAAN

17. Perbuatan sumbang *mahram*
18. Pelacuran
19. Muncikari
20. Persetubuhan luar nikah
21. Perbuatan sebagai persediaan untuk melakukan persetubuhan luar nikah
22. *Liwat*
23. *Musahagah*
24. *Khalwat*
25. Lelaki berlagak seperti perempuan
26. Perbuatan tidak sopan di tempat awam

BAHAGIAN V

KESALAHAN PELBAGAI

27. Memberikan keterangan, maklumat atau pernyataan palsu
 28. *Takfir*
 29. Memusnahkan atau mencemarkan masjid, dsb.
 30. Pemungutan *zakat* atau *fitrah* tanpa kuasa
 31. Pembayaran tak sah akan *zakat* atau *fitrah*
 32. Menggalakkan maksiat
 33. Memujuk lari perempuan bersuami
 34. Menghalang pasangan yang sudah bernikah daripada hidup sebagai suami isteri
 35. Menghasut suami atau isteri supaya bercerai atau mengabaikan kewajipan
 36. Memujuk lari perempuan
-

Seksyen

37. Menjual atau memberikan anak kepada orang bukan Islam
38. *Qazaf*
39. Penyalahgunaan tanda halal

BAHAGIAN VI

PENYUBAHATAN DAN PERCUBAAN

40. Penyubahatan
41. Menyubahati di dalam Negeri akan kesalahan-kesalahan di luar Negeri
42. Hukuman bagi penyubahatan
43. Tanggungan penyubahat jika perbuatan yang berlainan dilakukan
44. Percubaan

BAHAGIAN VII

KECUALIAN AM

45. Perbuatan Hakim apabila bertindak secara kehakiman
46. Perbuatan yang dilakukan menurut penghakiman atau perintah Mahkamah
47. Perbuatan yang dilakukan oleh seseorang yang mempunyai justifikasi di sisi undang-undang
48. Perbuatan kanak-kanak yang belum *baligh*
49. Perbuatan seseorang yang tak sempurna akal
50. Perbuatan orang yang terpaksa oleh sebab ugutan

BAHAGIAN VIII

PERKARA AM

51. Penetapan pusat pemulihan diluluskan atau rumah diluluskan
52. Kuasa Mahkamah untuk mengkomitkan orang yang disabitkan ke pusat pemulihan diluluskan
53. Kuasa Mahkamah untuk mengkomitkan pesalah perempuan ke rumah diluluskan
54. Pemansuhan

JADUAL

-

-

-

-

UNDANG-UNDANG SARAWAK

Bab 46

ORDINAN KESALAHAN JENAYAH SYARIAH, 2001

Suatu Ordinan bagi mengadakan peruntukan mengenai kesalahan jenayah Syariah, dan perkara-perkara yang berhubungan dengannya.

[]

Diperbuat oleh Badan Perundangan Sarawak—

BAHAGIAN I

PERMULAAN

Tajuk ringkas, permulaan kuat kuasa dan pemakaian

1.—(1) Ordinan ini bolehlah dinamakan Ordinan Kesalahan Jenayah Syariah, 2001 dan hendaklah mula berkuat kuasa pada tarikh yang ditetapkan oleh Ketua Menteri melalui pemberitahuan dalam *Warta*.

(2) Ordinan ini hendaklah terpakai hanya bagi orang Islam sahaja.

Tafsiran

2. Dalam Ordinan ini, melainkan jika konteksnya menghendaki makna yang lain—

“*baligh*” ertinya sudah cukup umur mengikut Undang-Undang Islam;

“*fatwa*” ertinya fatwa yang dikeluarkan di bawah seksyen 37 Ordinan Majlis Islam Sarawak, 2001 [*Bab 41*];

“Hakim” atau “Hakim Syariah” ertinya Ketua Hakim Syarie atau Hakim Mahkamah Rayuan Syariah, Hakim Mahkamah Tinggi Syariah atau Hakim Mahkamah Rendah Syariah, mengikut mana-mana yang berkenaan, yang dilantik di bawah seksyen 4, 5, 6 atau 8 Ordinan Mahkamah Syariah, 2001 [*Bab 42*];

“*lian*” ertinya sesuatu pengataan yang dibuat oleh seseorang lelaki dengan bersumpah mengikut Undang-Undang Islam bahawa isterinya telah melakukan zina;

“*liwat*” ertinya perhubungan seks sesama lelaki;

“Mahkamah” ertinya Mahkamah Rendah Syariah, Mahkamah Tinggi Syariah, atau Mahkamah Rayuan Syariah, mengikut mana-mana yang berkenaan, yang dibentuk di bawah seksyen 3 Ordinan Mahkamah Syariah, 2001 [*Bab 42*];

“Majlis” ertinya Majlis Islam Sarawak yang ditubuhkan di bawah seksyen 3 Ordinan Majlis Islam Sarawak, 2001 [*Bab 41*];

“Mufti” ertinya Mufti yang dilantik di bawah seksyen 35 Ordinan Majlis Islam Sarawak, 2001 [*Bab 41*];

“*muncikari*” ertinya seseorang yang bertindak sebagai orang tengah antara seorang perempuan dengan seorang lelaki bagi apa-apa maksud yang menyalahi Undang-Undang Islam;

“*musahaqah*” ertinya perhubungan seks sesama perempuan;

“Negeri” ertinya Negeri Sarawak;

“pusat pemulihan diluluskan” ertinya mana-mana tempat atau institusi yang ditetapkan sebagai sedemikian di bawah seksyen 51;

“*qazaf*” ertinya membuat pengataan palsu terhadap mana-mana orang;

“rumah diluluskan” ertinya mana-mana tempat atau institusi yang ditetapkan sebagai sedemikian di bawah seksyen 51;

“sumbang mahram” ertinya persetubuhan antara lelaki dan perempuan yang dilarang mengahwini satu sama lain di bawah Undang-Undang Islam;

“*takfir*” ertinya menganggap seseorang orang Islam sebagai orang bukan Islam;

“Undang-Undang Islam” ertinya Undang-Undang Islam mengikut Mazhab Syafie atau mengikut mana-mana satu Mazhab Maliki, Hanbali atau Hanafi sebagaimana yang diputuskan oleh Majlis;

“*zina*” ertinya persetubuhan antara lelaki dan perempuan tanpa nikah.

(2) Semua perkataan dan ungkapan yang digunakan dalam Ordinan ini dan yang tidak ditakrifkan dalamnya tetapi ditakrifkan dalam Ordinan Majlis Islam Sarawak, 2001 [*Bab 41*], Ordinan Mahkamah Syariah, 2001 [*Bab 42*], Kanun Keseksaan [*Akta 574*] atau mana-mana undang-undang bertulis lain hendaklah mempunyai erti yang diberikan kepadanya masing-masing dalam Ordinan-Ordinan atau undang-undang bertulis itu setakat yang ertinya itu tidak bercanggah dengan Undang-Undang Islam.

(3) Bagi mengelakkan keraguan tentang identiti atau tafsiran perkataan dan ungkapan yang digunakan dalam Ordinan ini yang disenaraikan dalam Jadual, rujukan bolehlah dibuat kepada tulisan Arab bagi perkataan dan ungkapan itu yang ditunjukkan bersempena dengannya dalam Jadual itu.

BAHAGIAN II

KESALAHAN BERHUBUNGAN DENGAN ‘AQIDAH

Pemujaan salah

3.—(1) Mana-mana orang yang memuja alam semula jadi atau melakukan apa-apa perbuatan yang menunjukkan pemujaan atau rasa hormat kepada mana-mana orang, binatang, tempat atau benda dengan apa-apa cara yang menyalahi Undang-Undang Islam adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

(2) Mahkamah boleh memerintahkan supaya apa-apa peranti, barang atau benda yang digunakan dalam pelakuan atau yang ada kaitan dengan kesalahan yang disebut dalam subseksyen (1) dilucuthakkan dan dimusnahkan, walaupun tiada seorang pun mungkin telah disabitkan atas kesalahan itu.

Doktrin palsu

4.—(1) Mana-mana orang yang mengajar atau menjelaskan apa-apa doktrin atau melaksanakan apa-apa upacara atau perbuatan yang berhubungan dengan agama Islam di mana-mana tempat, sama ada tempat persendirian atau tempat awam, adalah melakukan suatu kesalahan jika doktrin atau upacara atau perbuatan itu berlawanan dengan Undang-Undang Islam atau mana-mana *fatwa* yang sedang berkuat kuasa di dalam Negeri dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

(2) Mahkamah boleh memerintahkan supaya mana-mana dokumen atau benda yang digunakan dalam pelakuan atau yang ada kaitan dengan kesalahan yang disebut dalam subseksyen (1) dilucuthakkan dan dimusnahkan, walaupun tiada seorang pun mungkin telah disabitkan atas kesalahan itu.

Mengembangkan doktrin agama, dsb.

5. Mana-mana orang yang mengembangkan doktrin atau kepercayaan agama selain doktrin atau kepercayaan agama Islam di kalangan orang yang beragama Islam adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

Dakwaan palsu

6. Mana-mana orang yang—

(a) mengisytiharkan dirinya atau mana-mana orang lain sebagai rasul atau nabi, Imam Mahadi atau wali Allah; atau

(b) menyatakan atau mendakwa bahawa dia atau mana-mana orang lain mengetahui peristiwa atau perkara di luar pemahaman atau pengetahuan manusia,

sedangkan perisytiharan, pernyataan atau dakwaan itu adalah palsu dan berlawanan dengan ajaran Islam, adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya.

BAHAGIAN III

KESALAHAN YANG BERHUBUNGAN DENGAN KESUCIAN AGAMA ISLAM DAN INSTITUSINYA

Menghina, atau menyebabkan dipandang hina, dll., agama Islam

7. Mana-mana orang yang secara lisan atau secara bertulis atau dengan gambaran yang tampak atau dengan apa-apa cara lain—

(a) menghina agama Islam atau menyebabkan agama Islam dipandang hina;

(b) mempersendakan, mengajuk-ajuk atau mencemuh amalan atau upacara yang berhubungan dengan agama Islam; atau

(c) mempersendakan atau menyebabkan dipandang hina mana-mana undang-undang yang sedang berkuat kuasa di dalam Negeri yang berhubungan dengan agama Islam,

adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

Mempersendakan, dll. ayat Al-Quran atau *Hadith*

8. Mana-mana orang yang, dengan kata-katanya atau perbuatannya, mempersendakan, menghina, mencemuh atau menyebabkan dipandang hina ayat-ayat Al-Quran atau *Hadith* adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya.

Menghina atau mengingkari pihak berkuasa agama

9. Mana-mana orang yang bertindak dengan cara yang menghina pihak berkuasa agama atau mengingkari, melanggar atau mempertikaikan perintah atau arahan Majlis yang dinyatakan atau diberikan melalui fatwa, adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

Mengingkari perintah Mahkamah

10. Mana-mana orang yang mengingkari, melanggar, mempertikai, mempersenda atau menyebabkan dipandang hina apa-apa perintah Hakim atau Mahkamah adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

Mengajar agama tanpa *tauliah*

11.—(1) Mana-mana orang yang mengajar atau mengaku mengajar apa-apa perkara yang berhubungan dengan agama Islam tanpa *tauliah* yang diberikan oleh, atau dengan kebenaran bertulis, Majlis adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya.

(2) Subseksyen (1) tidaklah terpakai bagi—

(a) mana-mana orang atau golongan orang yang dikecualikan oleh Majlis; atau

(b) mana-mana orang yang mengajar atau mengaku mengajar apa-apa perkara yang berhubungan dengan agama Islam di dalam kediamannya sendiri kepada anggota keluarganya sendiri sahaja.

Pendapat yang bertentangan dengan *fatwa*

12. Mana-mana orang yang memberi, mengembang atau menyebarkan apa-apa pendapat tentang ajaran Islam, Undang-Undang Islam atau apa-apa isu yang bertentangan dengan mana-mana *fatwa* yang sedang berkuat kuasa di dalam Negeri adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

Penerbitan agama yang bertentangan dengan Undang-Undang Islam

13.—(1) Mana-mana orang yang—

(a) mencetak, menyiar, menerbit, merakam, menyebarkan atau dengan apa-apa cara lain menyebarkan apa-apa buku, risalah, dokumen atau apa-apa bentuk rakaman yang mengandungi apa-apa jua yang bertentangan dengan Undang-Undang Islam; atau

(b) ada dalam miliknya apa-apa buku, risalah, dokumen atau rakaman sedemikian,

adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

(2) Mahkamah boleh memerintahkan supaya mana-mana buku, risalah, dokumen atau rakaman yang disebut dalam subseksyen (1) dilucuthakkan dan dimusnahkan, walaupun tiada seorang pun mungkin telah disabitkan atas kesalahan itu.

Tidak menghormati Ramadhan

14. Mana-mana orang yang, pada waktu berpuasa dalam bulan Ramadhan,—

(a) menjual kepada mana-mana orang Islam apa-apa makanan, minuman, rokok atau benda lain yang seumpamanya untuk dimakan, diminum atau dihisap serta-merta dalam waktu itu; atau

(b) secara terbuka atau di tempat awam didapati makan, minum atau menghisap rokok atau benda lain yang seumpamanya,

adalah melakukan suatu kesalahan dan apabila disabitkan boleh dikenakan denda tidak melebihi satu ribu ringgit atau pemenjaraan selama tempoh tidak melebihi enam bulan atau kedua-duanya, dan bagi kesalahan yang kedua atau berikutnya boleh dikenakan denda tidak melebihi dua ribu ringgit atau pemenjaraan selama tempoh tidak melebihi satu tahun atau kedua-duanya.

Berjudi

15.—(1) Mana-mana orang yang berjudi, atau didapati berada di rumah judi, adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

(2) Dalam seksyen ini, “rumah judi” ertinya mana-mana premis, termasuk bilik, pejabat atau gerai, sama ada terbuka atau tertutup, yang digunakan atau disimpan bagi maksud penjudian apa-apa permainan yang keputusannya bergantung kepada nasib atau campuran kemahiran dan nasib, sama ada dibenarkan oleh mana-mana undang-undang lain atau sebaliknya, untuk mendapat wang atau nilai wang.

Minuman yang memabukkan

16.—(1) Mana-mana orang yang, di mana-mana kedai atau tempat awam lain, minum apa-apa minuman yang memabukkan adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

(2) Mana-mana orang yang membuat, menjual, menawar atau mempamerkan untuk jualan, menyimpan atau membeli apa-apa minuman yang memabukkan adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya.

BAHAGIAN IV

KESALAHAN YANG BERHUBUNGAN DENGAN KESUSILAN

Perbuatan sumbang *mahram*

17. Mana-mana orang yang melakukan perbuatan sumbang *mahram* adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

Pelacuran

18.—(1) Mana-mana perempuan yang melacurkan dirinya adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

(2) Mana-mana orang yang—

(a) melacurkan isterinya atau kanak-kanak perempuan dalam peliharaannya; atau

(b) menyebabkan atau membenarkan isterinya atau kanak-kanak perempuan dalam peliharaannya melacurkan diri,

adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

Muncikari

19. Mana-mana orang yang bertindak sebagai muncikari adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

Persetubuhan luar nikah

20.—(1) Mana-mana lelaki yang melakukan persetubuhan dengan seorang perempuan yang bukan isterinya yang sah adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

(2) Mana-mana perempuan yang melakukan persetubuhan dengan seorang lelaki yang bukan suaminya yang sah adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

(3) Hakikat bahawa seorang perempuan hamil luar nikah akibat daripada persetubuhan yang dilakukan dengan kerelaannya adalah keterangan *prima facie* tentang pelakuan kesalahan di bawah subseksyen (2) oleh perempuan itu.

(4) Bagi maksud subseksyen (3), mana-mana perempuan yang melahirkan anak yang sempurna sifatnya dalam tempoh yang kurang daripada enam bulan *qamariah* dari tarikh pernikahannya hendaklah disifatkan telah hamil luar nikah.

Perbuatan sebagai persediaan untuk melakukan persetubuhan luar nikah

21. Mana-mana orang yang melakukan apa-apa perbuatan sebagai persediaan untuk melakukan persetubuhan luar nikah adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duaya.

Liwat

22. Mana-mana lelaki yang melakukan *liwat* adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

Musahaqah

23. Mana-mana perempuan yang melakukan *musahaqah* adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu.

Khalwat

24. Mana-mana—

(a) lelaki yang didapati berada bersama dengan seorang atau lebih daripada seorang perempuan yang bukan isteri atau *mahramnya*; atau

(b) perempuan yang didapati berada bersama dengan seorang atau lebih daripada seorang lelaki yang bukan suami atau *mahramnya*,

di mana-mana tempat yang terselindung atau di dalam rumah atau bilik dalam keadaan yang boleh menimbulkan syak bahawa mereka sedang melakukan perbuatan yang tidak bermoral adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

Lelaki berlagak seperti perempuan

25. Mana-mana lelaki yang memakai pakaian perempuan dan berlagak seperti perempuan di mana-mana tempat awam atas tujuan yang tidak bermoral adalah melakukan suatu kesalahan dan apabila disabitkan boleh dikenakan denda tidak melebihi satu ribu ringgit atau pemenjaraan selama tempoh tidak melebihi satu tahun atau kedua-duanya.

Perbuatan tidak sopan di tempat awam

26. Mana-mana orang yang bertindak atau berkelakuan tidak sopan bertentangan dengan Undang-Undang Islam di mana-mana tempat awam adalah melakukan suatu kesalahan dan apabila disabitkan boleh dikenakan denda tidak melebihi satu ribu ringgit atau pemenjaraan selama tempoh tidak melebihi enam bulan atau kedua-duanya.

BAHAGIAN V
KESALAHAN PELBAGAI

Memberikan keterangan, maklumat atau pernyataan palsu

27.—(1) Mana-mana orang yang memberikan keterangan palsu atau memalsukan keterangan bagi maksud ia digunakan dalam apa-apa peringkat dalam sesuatu prosiding kehakiman di Mahkamah adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

(2) Mana-mana orang yang mengetahui atau mempunyai sebab untuk mempercayai bahawa suatu kesalahan telah dilakukan di bawah Ordinan ini atau di bawah mana-mana undang-undang bertulis lain yang berhubungan dengan agama Islam, memberikan apa-apa maklumat berhubungan dengan kesalahan itu yang diketahuinya atau dipercayainya sebagai palsu adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

Takfir

28.—(1) Tetakluk kepada subseksyen (2), mana-mana orang yang mengatakan atau menohmahkan dengan perkataan, sama ada secara lisan atau bertulis, atau dengan isyarat atau gambaran tampak, atau dengan apa-apa perbuatan, aktiviti atau pelakuan, atau dengan menganjurkan, menaja atau membuat perkiraan bagi apa-apa aktiviti atau selainnya dengan apa-apa cara, bahawa mana-mana orang yang menganut agama Islam atau orang yang tergolong dalam apa-apa kumpulan, golongan atau perihalan orang yang menganut agama Islam—

- (a) adalah kafir;
 - (b) tidak lagi menganut agama Islam;
 - (c) tidak sepatutnya diterima, atau tidak boleh diterima, sebagai menganuti agama Islam; atau
-

(d) tidak mempercayai, mengikuti, menganuti, atau tergolong dalam, agama Islam,

adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya.

(2) Subseksyen (1) tidaklah terpakai bagi—

(a) apa-apa jua yang dilakukan oleh mana-mana Mahkamah atau pihak berkuasa agama yang ditubuh, dibentuk atau dilantik oleh atau di bawah mana-mana undang-undang bertulis dan yang diberi kuasa untuk membuat atau mengeluarkan apa-apa keputusan mengenai apa-apa perkara yang berhubungan dengan agama Islam; dan

(b) apa-apa jua yang dilakukan oleh mana-mana orang menurut atau mengikut apa-apa keputusan yang dibuat atau dikeluarkan oleh Mahkamah atau pihak berkuasa agama sedemikian, sama ada atau tidak keputusan itu adalah sebagai bertulis atau, jika bertulis, sama ada atau tidak ia disiarkan dalam *Warta*.

Memusnahkan atau mencemarkan masjid, dsb.

29. Mana-mana orang yang memusnah, merosak atau mencemarkan mana-mana masjid atau tempat beribadat lain atau apa-apa kelengkapannya dengan niat menghina atau mempersendakan agama Islam adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya.

Pemungutan *zakat* atau *fitrah* tanpa kuasa

30. Mana-mana orang yang memungut *zakat* atau *fitrah* atau menyebabkan dipungut *zakat* atau *fitrah* tanpa dia dilantik sebagai amil atau selainnya diberi kuasa oleh Majlis adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya, dan Mahkamah hendaklah memerintahkan supaya pungutan itu dirampas dan dibayar ke dalam Baitulmal yang ditubuhkan di bawah seksyen 45 Ordinan Majlis Islam Sarawak, 2001 [*Bab 41*].

Pembayaran tak sah akan *zakat* atau *fitrah*

31. Mana-mana orang yang membayar atau menyebabkan supaya dibayar *zakat* atau *fitrah* kepada mana-mana orang yang tidak diberi kuasa secara sah untuk memungut *zakat* atau *fitrah* adalah melakukan suatu kesalahan dan apabila disabitkan boleh dikenakan denda tidak melebihi satu ribu ringgit atau pemenjaraan selama tempoh tidak melebihi enam bulan atau kedua-duanya.

Menggalakkan maksiat

32. Mana-mana orang yang menganjur, mendorong atau menggalakkan orang lain untuk melakukan apa-apa maksiat adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya.

Memujuk lari perempuan bersuami

33. Mana-mana orang yang memujuk lari seorang perempuan bersuami atau membawanya keluar dari atau dengan apa-apa cara mempengaruhinya supaya meninggalkan kediaman suami isteri yang ditentukan oleh suaminya adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya, dan Mahkamah hendaklah memerintahkan perempuan tersebut supaya kembali kepada suaminya.

Menghalang pasangan yang sudah bernikah daripada hidup sebagai suami isteri

34. Mana-mana orang yang menghalang sesuatu pasangan yang sudah bernikah daripada hidup sebagai suami isteri yang sudah bernikah dengan sah adalah melakukan suatu kesalahan dan apabila disabitkan boleh dikenakan denda tidak melebihi dua ribu ringgit atau pemenjaraan selama tempoh tidak melebihi satu tahun atau kedua-duanya, dan Mahkamah hendaklah memerintahkan pasangan itu supaya hidup sebagai pasangan suami isteri yang sudah bernikah dengan sah.

Menghasut suami atau isteri supaya bercerai atau mengabaikan kewajipan

35. Mana-mana orang yang menghasut, memaksa atau memujuk mana-mana lelaki atau perempuan supaya bercerai atau mengabaikan kewajipan dan tanggungjawabnya sebagai suami atau isteri adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya.

Memujuk lari perempuan

36. Mana-mana orang yang memujuk lari atau mendorong atau memujuk mana-mana perempuan supaya lari daripada jagaan ibu bapanya atau penjaganya adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya, dan Mahkamah boleh membuat apa-apa perintah yang difikirkannya sesuai berkenaan dengan perempuan itu.

Menjual atau memberikan anak kepada orang bukan Islam

37. Mana-mana orang yang menjual, memberi atau menyerahkan anaknya atau kanak-kanak di bawah peliharaannya kepada mana-mana orang yang bukan beragama Islam adalah melakukan suatu kesalahan dan apabila disabitkan boleh dikenakan denda tidak melebihi tiga ribu ringgit atau pemenjaraan selama tempoh tidak melebihi dua tahun atau kedua-duanya, dan Mahkamah boleh membuat apa-apa perintah yang difikirkannya sesuai berkenaan dengan anak atau kanak-kanak itu.

Qazaf

38. Kecuali dalam kes *li'an*, mana-mana orang yang menuduh orang lain melakukan *zina* tanpa mengemukakan, mengikut Undang-Undang Islam, empat orang saksi atau *iqrar* orang yang dituduh itu adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya.

Penyalahgunaan tanda halal

39. Mana-mana orang yang mempamerkan, tanpa kebenaran Majlis, pada atau berkenaan dengan mana-mana makanan atau minuman yang tidak halal, apa-apa tanda yang menunjukkan bahawa makanan atau minuman itu adalah halal adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau pemenjaraan selama tempoh tidak melebihi tiga tahun atau kedua-duanya.

BAHAGIAN VI**PENYUBAHATAN DAN PERCUBAAN****Penyubahatan**

40. Seseorang menyubahati pelakuan sesuatu perkara jika dia—

(a) menghasut mana-mana orang supaya melakukan perkara itu;

(b) mengambil bahagian bersama dengan seorang atau lebih daripada seorang lain dalam apa-apa pakatan jahat untuk melakukan perkara itu, jika sesuatu perbuatan atau ketinggalan yang menyalahi undang-undang berlaku ekoran daripada pakatan jahat itu, dan dengan tujuan hendak melakukan perkara itu; atau

(c) dengan sengaja membantu, dengan apa-apa perbuatan atau ketinggalan yang menyalahi undang-undang, pelakuan perkara itu.

Huraian 1 — Seseorang yang, dengan pernyataan salah sengaja, atau penyembunyian sengaja suatu fakta material yang dia terikat mendedahkannya, dengan sengaja menyebabkan atau mendapatkan, atau cuba untuk menyebabkan atau mendapatkan, supaya sesuatu perkara dilakukan adalah dikatakan menghasut supaya perkara itu dilakukan.

Huraian 2 — Mana-mana orang, sama ada sebelum atau pada masa pelakuan sesuatu perbuatan, melakukan apa-apa jua dengan tujuan memudahkan pelakuan perbuatan itu, dan dengan itu memudahkan pelakuan itu, adalah dikatakan membantu dalam melakukan perbuatan itu.

Menyubahati di dalam Negeri akan kesalahan-kesalahan di luar Negeri

41. Seseorang adalah menyubahati sesuatu kesalahan mengikut pengertian Ordinan ini jika di dalam Negeri dia menyubahati pelakuan suatu perbuatan di luar Negeri yang akan menjadi suatu kesalahan sekiranya dilakukan di dalam Negeri.

Hukuman bagi penyubahatan

42. Mana-mana orang yang menyubahati apa-apa kesalahan hendaklah, jika perbuatan yang disubahati itu dilakukan menurut penyubahatan itu, dihukum dengan hukuman yang diperuntukkan bagi kesalahan itu.

Tanggungan penyubahat jika perbuatan yang berlainan dilakukan

43. Jika sesuatu perbuatan disubahati dan suatu perbuatan yang berlainan dilakukan, penyubahat itu bertanggung bagi perbuatan yang dilakukan mengikut cara yang sama dan sehingga takat yang sama seolah-olah dia telah menyubahati perbuatan yang dilakukan jika perbuatan yang dilakukan—

(a) adalah akibat barangkali daripada penyubahatan itu; dan

(b) telah dilakukan dengan pengaruh hasutan itu, atau dengan bantuan atau ekoran daripada pakatan jahat yang mewujudkan penyubahatan itu.

Percubaan

44.—(1) Mana-mana orang yang cuba—

(a) melakukan sesuatu kesalahan yang boleh dihukum di bawah Ordinan ini atau di bawah mana-mana undang-undang bertulis lain yang berhubungan dengan Undang-Undang Islam; atau

(b) menyebabkan kesalahan itu dilakukan,

dan dalam percubaan itu melakukan apa-apa perbuatan ke arah pelakuan kesalahan itu hendaklah, jika tiada peruntukan nyata dibuat oleh Ordinan ini atau undang-undang bertulis lain itu, mengikut mana-mana yang berkenaan, bagi hukuman percubaan itu, dihukum dengan apa-apa hukuman yang diperuntukkan bagi kesalahan itu.

(2) Apa-apa tempoh pemenjaraan yang dikenakan sebagai hukuman bagi suatu percubaan untuk melakukan suatu kesalahan atau untuk menyebabkan suatu kesalahan dilakukan tidak boleh melebihi satu perdua daripada tempoh maksimum pemenjaraan yang diperuntukkan bagi kesalahan itu.

BAHAGIAN VII

KECUALIAN AM

Perbuatan Hakim apabila bertindak secara kehakiman

45. Tidaklah menjadi kesalahan apa-apa jua yang dilakukan oleh seorang Hakim apabila bertindak secara kehakiman pada menjalankan apa-apa kuasa yang diberikan kepadanya, atau yang dia dengan suci hati percaya telah diberikan kepadanya, oleh undang-undang.

Perbuatan yang dilakukan menurut penghakiman atau perintah Mahkamah

46. Tidaklah menjadi kesalahan apa-apa jua yang dilakukan menurut, atau yang diwajibkan oleh, penghakiman atau perintah Mahkamah, jika dilakukan semasa penghakiman atau perintah itu masih berkuat kuasa, walaupun Mahkamah itu tidak mempunyai bidang kuasa untuk membuat penghakiman atau perintah itu, jika orang yang melakukan perbuatan itu percaya dengan suci hati bahawa Mahkamah itu mempunyai bidang kuasa untuk membuat penghakiman atau perintah itu.

Perbuatan yang dilakukan oleh seseorang yang mempunyai justifikasi di sisi undang-undang

47. Tidaklah menjadi kesalahan apa-apa jua yang dilakukan oleh seseorang yang mempunyai justifikasi di sisi undang-undang atau yang oleh sebab kesilapan fakta dan bukan kesilapan undang-undang dengan suci hati percaya bahawa dia mempunyai justifikasi di sisi undang-undang untuk melakukan yang demikian.

Perbuatan kanak-kanak yang belum *baligh*

48. Tidaklah menjadi kesalahan apa-apa jua yang dilakukan oleh kanak-kanak yang belum *baligh*.

Perbuatan seseorang yang tak sempurna akal

49.—(1) Tidaklah menjadi kesalahan apa-apa jua yang dilakukan oleh seseorang yang pada masa melakukan perbuatan itu, oleh sebab ketaksempurnaan akalnya, tak berupaya mengetahui sifat sebenar perbuatan itu, atau bahawa apa yang dilakukannya adalah salah dan berlawanan dengan undang-undang.

(2) Bagi maksud seksyen ini, jika seseorang berada dalam keadaan mabuk pada masa perbuatan atau ketinggalan yang diadukan itu dan—

(a) keadaan mabuk itu adalah sedemikian rupa sehingga dia tidak tahu bahawa perbuatan atau ketinggalan itu adalah salah atau dia tidak tahu apa yang dilakukannya; dan

(b) keadaan mabuk itu telah terjadi tanpa persetujuannya dan akibat perbuatan niat jahat atau kecuaiannya seorang yang lain,

maka dia hendaklah disifatkan sebagai orang yang tak sempurna akal.

(3) Dalam seksyen ini, “mabuk” hendaklah disifatkan termasuk keadaan yang dihasilkan oleh dadah.

Perbuatan orang yang terpaksa oleh sebab ugutan

50.—(1) Tidaklah menjadi kesalahan apa-apa jua yang dilakukan oleh seseorang yang terpaksa melakukannya oleh sebab ugutan yang sedemikian sifatnya sehingga menyebabkan orang itu semunasabahnya percaya, pada masa dia melakukan perbuatan itu, bahawa jika dia tidak melakukannya dia akan mati pada masa itu juga.

(2) Kekecualian di bawah subseksyen (1) tidaklah terpakai jika orang yang melakukan perbuatan itu telah meletakkan dirinya, dengan kerelaannya sendiri, dalam keadaan yang menjadikannya tertakluk kepada paksaan itu.

BAHAGIAN VIII**PERKARA AM****Penetapan pusat pemulihan diluluskan atau rumah diluluskan**

51. Majlis boleh, melalui pemberitahuan dalam *Warta*, menetapkan mana-mana tempat atau institusi menjadi pusat pemulihan diluluskan atau rumah diluluskan bagi maksud Ordinan ini.

Kuasa Mahkamah untuk mengkomitkan orang yang disabitkan ke pusat pemulihan diluluskan

52. Jika Mahkamah telah mensabitkan mana-mana orang atas suatu kesalahan di bawah Bahagian II atau di bawah seksyen 7, 8, 9 atau 28, Mahkamah itu boleh, sebagai ganti atau sebagai tambahan bagi apa-apa hukuman yang ditentukan bagi kesalahan itu, memerintahkan mana-mana orang sedemikian dikomitkan ke pusat pemulihan diluluskan untuk menjalani apa-apa kaunseling atau pemulihan selama apa-apa tempoh yang tidak melebihi enam bulan sebagaimana yang dinyatakan dalam perintah itu; tetapi jika apa-apa hukuman pemenjaraan dikenakan sekali dengan kaunseling atau pemulihan itu, tempohnya tidaklah boleh melebihi agregat tiga tahun.

Kuasa Mahkamah untuk mengkomitkan pesalah perempuan ke rumah diluluskan

53. Jika Mahkamah telah mensabitkan mana-mana perempuan atas suatu kesalahan di bawah Bahagian IV, Mahkamah itu boleh, sebagai ganti atau sebagai tambahan bagi apa-apa hukuman yang ditentukan bagi kesalahan itu, memerintahkan perempuan itu dikomitkan ke rumah diluluskan selama apa-apa tempoh yang tidak melebihi enam bulan sebagaimana yang dinyatakan dalam perintah itu; tetapi jika apa-apa hukuman pemenjaraan dikenakan sekali dengan komital itu, tempohnya tidaklah boleh melebihi agregat tiga tahun.

Pemansuhan

54.—(1) Ordinan Kesalahan Jenayah Syariah, 1991 [*Ord. No. 6/91*] adalah dengan ini dimansuhkan.

(2) Walau apa pun subseksyen (1), segala prosiding di bawah Ordinan dimansuhkan itu, termasuk apa-apa rayuan daripada mana-mana Mahkamah di bawah Ordinan dimansuhkan itu, hendaklah diteruskan seolah-olah Ordinan ini telah tidak diluluskan.

JADUAL

(Seksyen 2(3))

TULISAN DALAM BAHASA ARAB BAGI PERKATAAN DAN
UNGKAPAN TERTENTU

'aqidah	—	عقيدة
baligh	—	بالغ
Hadith	—	حديث
iqrar	—	إقرار
li'an	—	لعان
mahram	—	محرم
musahqah	—	ساحقة
qamariah	—	قمريّة
qazaf	—	قذف
takfir	—	تكفير
zina	—	زنا



DICETAK OLEH PERCETAKAN NASIONAL MALAYSIA BERHAD, KUCHING, SARAWAK
Tel: 082-241131, 241132, 248876 Fax: 082-412005
E. mail: pnmk@printnasiona.com.my
Website: <http://www.printnasiona.com.my>
BAGI PIHAK DAN DENGAN KUASA PERINTAH KERAJAAN SARAWAK
